

qu'aux autres prouinces du Canada que nous auons veües: & font toufiours d'autant plus belles, le pays plus beau, & les terres meilleures, que plus on auance tirant au Sû: car du costé du Nord les terres font plus sablonneuses, les pays plus montagneux, et les forests plus desgarnies de gros bois, finon de cedres qui croissent mesme iusques dans les veines des rochers, comme ie vis voyageant sur la Mer douce, pour la pesche du grand poisson.

Il y a plusieurs contrées ou provinces au pays de nos Hurons qui portent diuers noms, & font gouuernées par diuers Capitaines ou chefs generaux & particuliers dependans & independans, celle où commandoit le grand Capitaine Atironta s'appelle *Renarhonon*, celle d'Entauaque s'appelle *Atigagnongueha*, & la Nation des Ours qui est celle où nous demeurions sous le grand Capitaine Auoindaon s'appelle *Atingyahointan*, & en cette estendue de pays il y a environ vingt ou vingt cinq tant villes que villages, dont une partie ne font point clos ny fermez, & les autres sont fortifiez de longues boises de bois à triples rangs, à la hauteur d'une longue picque entrelassées les unes dans les autres & redoublées par dedans de grandes & grosses escorces de huit à neuf pieds de haut, par dessus il y a de grands arbres esbranchez posez de leur long sur les troncs des arbres faits en fourchettes, fort courtes pour les tenir en estat, puis au dessus de ces pallissades & fermetures, il y a des galleries ou guerittes qu'ils appellent *Ondaqua*, lesquelles ils garnissent de pierres en temps de guerre pour ruer sur l'ennemy, & d'eau pour esteindre le feu qu'il y

247